

漳州府志卷之四十四

藝文四 乾隆志卷二十八

記

漳浦縣文廟碑記

明王 禕 郡別駕 義烏人

洪武二年正月漳浦縣新作孔子廟成始張侯將爲廟以  
其事言郡府禕適忝佐郡許爲之記及是廟成而禕逼於  
召命還京師因辭其請侯復使來言曰廟成而記之執事  
嘗墜言矣願無卒辭辭既不獲迺爲書其成績以爲記按  
郡志漳爲州始於唐垂拱二年實治漳浦縣後以其地有  
瘴癘州移治龍溪西漳浦爲縣如故其縣之有學則自宋

漳州府志

卷之四十四

藝文四

一

二百九十九

慶歷四年始蓋自漢以來孔子有廟不出闕里唐制天下  
州縣始皆立廟祀孔子然漳浦之有學雖始於宋而學之  
有廟始於唐矣國家既定天下廟學兼備悉遵近代之制  
漳入職方朝廷揀賢才以牧遠人而吾張侯被選宰漳浦  
既至用故事謁孔子廟見其棟撓柱折頽弊已甚慨然歎  
曰事有急於此者乎卽簡材募工以十一月庀事僅兩月  
而廟已成列楹二十有八以間計者三其崇三十有二尺  
廣五十有五尺而深如廣之數輪奐具美規制聿加既又  
治其門廡修其墻垣於是始稱其爲聖人之居而講經之  
堂肄業之所與庖湍之屬皆易其舊使之新而學制咸備

矣迺二月丁卯侯率僚屬及爲士者行釋菜之禮又俾民之子弟游於學而延名儒爲之師凡可以崇教道而敦俗化者侯無不究心也蓋漳浦爲縣界乎閩廣之交其境阻山而負海姦宄所出沒其俗悍其民易以動嶺海之間厥爲巖邑故必得長民者舉聖人之道以導之使其復仁義禮智之性而明乎君臣父子夫婦長幼朋友之倫然後俗易以化而政易以成也侯夙以文學名其爲漳浦勤於政理而尤汲汲焉學校是興可謂知政本矣所可書者詎止工役之勤而已哉是役也廟之費爲最重故禕舉其重者特書之使刻之石用以志漳浦之學其興自張侯始侯名

## 漳州府志

### 卷之四十四

藝文四

二

四百四十八

理字玉文番禺人以承事郎再調來漳浦佐其事者丞金華陳堯民典史錢塘方好文也

### 漳州府新建府治記

林

弼

龍溪登州守

洪武戊申春州始入職方其年八月潘公琳奉旨錫印來知州事既至視故府治漏蠹弛剝歲久弗葺垂就頽壓慨然曰惟國家奄有海內邊隅旣靖不以琳爲匪材使首政茲郡所以尊嚴威聳觀聽者實于是焉繫撤舊爲新我其敢不力然役大費鉅吾不勞吾民也方與僚幕議所便而諸禪僧羣來言以兵餘人困公幸垂念邊人之福也吾教以慈悲憫世爲事而吾徒荷國之休食土之入時有升斗

之贏敢不心公之心思所佐官之費而代民之勞府治幸  
責以成無煩公慮也公義之允其請於是緇徒雲集鳩材  
聚石舟運陸輦咸爭勸趨百工既衆羣能畢効前建廳事  
後爲燕堂翼以廳幕司中門外表四周堦垣並作且舉凡  
爲屋以閒計者三十有五楹計者若干廳事高若干尺廣  
若干尺燕堂高如廳事而廣加三之一焉門之高視堂殺  
若干尺宏敞嚴邃不侈不踰諸侯之制斯備矣始事於是  
年十二月明年三月告成帑不知費民不知勞公以唐臣  
受廛屬邑知構興之巔末也命記歲月竊惟府治者政化  
之所自出新之凡以爲民也爲民而勞民宜夫仁者之不

漳州府志

卷之四十四

藝文四

三

四百五十八

忍乎此也古之所謂賢守令亦曰於民事處置得宜而已  
公蒞政之始惓惓以恤民爲心故茲役之興不勞其所勞  
而勞其所佚其勤渠黽勉出於心之不容己者豈非公之  
處事有宜而愛民之誠足以感孚於民哉傳曰上好仁下  
必好義余觀此尤信公字師道維揚人由南昌守來爲是  
邦其問學政事中外推先云贊是役者通判玉侯禕任役  
僧曰玉海月庭聞極明極藏山皆集勞可書

漳州府進士題名記

李東陽

大學士

科目之制中選者必揭名于榜榜不過一再揭又刻名于  
梓以爲錄則傳之四方顯且加久而進士科尤重則又刻

名于石樹之國學以示後世其顯且久蓋倍蓰焉國學之重科目如此若四方郡縣人林所自出地又以爲國學所立石非觀國游學者不可得見乃或倣茲遺制立石學宮使凡天下之生於其地游於其學者皆得知科目之爲重是其名與國同久而其顯也抑又甚焉然此特有司之事不著于令故科目之士恒有而茲石不恒建惟文獻之富及政制之周且密者則有之漳州府有六屬縣縣之附郭者曰龍溪士名龍溪出六學之舉鄉貢及進士者科不乏人有司彙次名氏題于府學之壁自始題至續錄閱若干歲矣吾友姜君用貞來知府事觀其學宮見其粉墨剝落

## 漳州府志

### 卷之四十四

藝文四

四

四百五十五

寢不可辨乃礪巨石刻其名以府縣分列以科舉年歲先後虛其下以俟續刻者寓書京師屬余記余惟國之于士也非獨富貴其身而又顯其名故在鄉選有貢士之名在甲科有進士之名天下之名爲尊官顯爵者未嘗不藉此以爲重及控名責實臺有評省有覈周達無滯者名能官潔清不污者名廉吏守節不撓者名忠臣而其大者則紀於太常書於景鐘藏於金匱石室天下之所謂名者至於此而後定則官爵皆不足賴况科目乎夫科目之設將以求賢才爲天下用也賢才非天下所常有故歲計之不過□百藩計之不過數十而鄉計之不過數人於此之中求

所謂廉能忠節之大蓋一代而不數見也故爲士者非徒榮名之難而令名爲尤難此石雖久未足賴以爲重也况有貪污邪佞者出乎其間人將顧指而議之邪夫土而不能爲官爲吏爲臣不可以名科目之士人而不廉不能不忠不可以名爲人由是言之則無俟乎作養傲厲之政亦可以興矣而况有作而倣之者邪漳大郡其自科目爲尊官著偉績有茲石所不能載者而其名固自在也苟名茲石者皆感勵奮發以廉能忠節爲天下用使後之論者求之金匱石室間則茲名也不益爲科目光邪若筌蹄經史梯航科目惟茲石之惟慕則其自待於世亦輕矣姜君嘉

漳州府志

卷之四十四

藝文四

五

四百三十八

興人與余同舉進士廉能有文章其在漳救荒除盜尤以正鄉俗作人材爲務非徒爲善政者漳之人其亦思無負於君哉

漳州衛指揮同知顧侯全城碑記

姜

諒

本郡守  
嘉禾人

成化己亥仲冬余以刑部郎中出守漳郡間延縉紳父老間民疾苦因言都閩顧侯斌全城之功且言侯喪踰十載不克葬余愀然謀諸郡中無貴賤樂賻而葬之衆曰藏侯身義也紀侯功尤義也不有刻碑何以慰今而詔後乎遂採輿論而得梗槩侯忠義威武智攬羣策而善用之正統末沙寇鄧茂七倡亂八郡騷動漳居邊隅罹禍尤甚時侯

僉衛事把總防倭適邊海城寨俱各警急侯度孤城莫支散軍各護本城獨握水軍五百人從海道擊賊抵城南溪請入弗納請糧弗與侯乃反軍借糧沿海稅戶周世綱等家且調之樹柵收兵夾輔護城既而匝郊賊壘相望城門石寨賊日造攻城車樓將憑東門登之危在旦夕城中喪胆奔走無地相視涕泣侯毅然謂衆曰吾任天子衛城之寄陷城不救何立于世且城破家辱吾等何之乃潛然出涕義氣奮發昭露忠勇布示威武諭軍士以死救城分處兵船三百夾清海叛卽日捨命趨南城去石開門束整入城衆以爲天兵下侯立散家財給軍餉募養死士數百設

漳州府志

卷之四十四

藝文四

六

四百五十八

祭旗纛玄壇關廟對神誓死滅賊軍不戎衣粧扮以綵插雞雉服虎豹擬神兵卜吉侯兜鍪左斧右刀抗弦以箭躍馬大呼率先鋒百勇飛出東門壓砍前賊破之麾死士分砍翼賊敗之爭出百斧砍其車樓并登城梯具焚之燎其窩壘縱兵促之賊遁一晝夜復益兵來攻侯以白金綵緞各徵舟兵萬至出軍夾攻殺賊如邱餘黨夜縱火郊郭神廟而去大難以解城用保全乃享軍士犒舟師隨之海還各借糧家侯入城分駕兵船召回仍軍海上尋征南總兵保定伯參將范都督下大軍召見待以殊禮鎮守福建刑部尚書薛公希璉巡按御史陳公員韜歷奏厥功擢福建

都指揮僉事奉勅備委至今事掛人口可以紀述昭示永久嗚呼歷觀古之有功德於民者必其食天之報負大有爲於前者必垂聲光於後當茂七倡亂漳被圍五十餘日人如釜魚旦夕垂死侯奮忠義提防海孤軍募民兵援城全之以活千萬命其功德於漳大矣故生膺都閩之擢沒致人心之思其食天之報而垂聲光於後者何莫非忠義之所感召歟此可見天理之所以常存而人心之所以不死余述此文豈獨爲侯已哉蓋有以表漳俗之善且勸忠義於後世焉

重修官港記

王仲謙

本郡守

漳州府志

卷之四十四

藝文四

七

四百二十九

水利必人力而後興有興一世之利者有興一方之功者澤民之功有大小惠則一而已予以洪武甲戌由胄監出守于漳時陳生子確執吏役于府曹一日率鄉人楊敬和等詣庭下言狀曰漳之龍溪縣二十九三十都大海環其東南羣山囿于西北地形礪确凸凹非高平廣陸北高燥者每病于旱乾卑窪者常虞于鹹鹵雖厚稔之歲得失恒相半焉昔宋淳熙二年有里人進士丁知幾者嘗簿潮邑於本鄉欲興水利以惠一方乃率鄉人陳大柔等赴福建提舉司陳水利狀躡之下其事于郡邑募民自二十八都文甲保下至二十九都石美保開地爲港一道濶爲尺一

十有八深爲尺一十有六以通柳營江淡水凡若干里于內堰石爲陡門二所以防旱潦又爲小石橋十餘橫卧港上以通往來每于農隙之時官爲督修故號曰官港刻石立碑爲記二都之田無高下遠邇咸賴其灌溉于今二百三十九年矣越歷歲久壅塞殆半耕者病之必藉于官庶修之功易集予慨然曰興水利以便民事予職之先務也奚容以煩劇辭乃榜其民爲修治之舉仍令子確董其役民樂于趨事赴功期月而知幾之舊址視昔如新其橋爲倍廣耕者利行者便焉旣功訖復來請記予謂水利之在天下猶元氣之在一身一息不通則患害及之予以感知

漳州府志

卷之四十四

藝文四

八

四百四十九

幾能惠一方而嘉子確能繼前人之志者也祭法曰有功于民者祀之知幾其有功于民乎因命子確率鄉人修其祠奠之仍示鄉人歲時加修葺焉厥後之享其利者知其功之有自始云予以布衣儒生致身二千石恩莫大焉是役也雖不敢倣蜀郡穿煎洩之文翁築馬塘之馬臻然使水無壅塞之憂田獲灌溉之利亦富國阜民之一助也

陳北溪先生祠堂記

周孟中

提學

道之難傳也尚矣孔子之門其徒三千而顏曾之傳獨得其宗顏子之資隣於生知其傳道固宜曾子之才魯而卒傳其道豈非以其學之確乎曾子傳之子思子思傳之孟

子而其傳泯焉濂溪周子崛起默契道體而傳之二程子程門高弟莫過游楊亦未免流於異學至新安朱文公繼起而洙泗濂洛之道始復大明當時從游者半天下晚守漳郡北溪陳先生始游其門而卒傳其道豈偶然哉先生貌木訥而語期吃初見文公語以上達蓋啓之以高明再見文公語以下學蓋究之以精微先生聞言卽悟鑽仰彌篤以誠敬爲入門以格致爲切要徹上徹下終始不遺堯舜禹湯之爲君臯陶周召之爲臣孔孟周程之爲學上下數千百年靡不貫徹於一心其所著詩文五十卷及字訓一篇又皆所以明天地之化發聖賢之蘊辨異端之惑開

漳州府志

卷之四十四

藝文四

九

四百五十八

後學之迷今皆可考也非得斯道之傳其能然哉文公之門若先生者殆非孔門之曾氏乎於乎斯道之在人不可玉而富不軒冕而貴不生而存不死而亡關百王而一心貫萬古而一理得其道雖窮居陋巷君子也不得其道雖富貴卿相小人也先生年逾六十始授縣簿未上而卒可謂窮矣自今沒後幾三百年流風餘韻猶有存者漳人冠婚喪祭多用文公家禮自大夫以至庸人莫不知稱北溪先生焉究其歸雖與天壤並有可也蒙庵先生萬容自少爲朱氏學居官冰蘖未老乞歸其清風高節海內稱之信無愧於先生鄉人也因其郡守姜君諒等相繼作祠祀先

生以書來委孟中作記謹書此以誌之石

漳州衛旗纛廟記

黃芳同知

古者爲國必先制軍令軍衆者莫如旗旗之大者曰纛所以重威武肅部伍而一之者也中春振旅司馬以旗致民弊旗後至者誅善戰者望之而知勝負焉是故辨色以審方因物以昭義王載太常昭其明也諸侯載旂昭其變也軍吏而不各殊其載而獨以纛名示有統也軍發則祭將戰則祭自帝畿達於戎鎮下至封戍之長又各以時祭崇賽禱也其用也於行爲金金盛而霜冽物乃時殺祭以霜降應其候也故秩百神者文之所有事也旗纛之祭武之

漳州府志

卷之四十四

藝文四

十

四百四十一

所有事也卽介冑而陳鼎俎肆容節寓文教也義以建之統以尊之禱以致之候以信之文以將之神之德著矣漳州衛常祀有廟歲久圯敝鞠爲穢區正德癸酉掌衛指揮同知侯君汴請命當道鳩工聚材斥隘爲宏易瑕以堅中築臺爲神棲東西爲寢以寓賓旅前爲堂以便聽事旁列庖溷兩隅置複室庀器具設僕守門垣黜堊規制整如也漳故多寇侯君數從戰陣更事久智識幹蠱迴出夷儕廟成之明年春鎮巡推任守備外支江廣之寇內輯山海之變檄至而戰勃如將弗任迺翹士衆而命之卽新廟而展事焉是日芳預賀列因得周眎歎曰是將衍世德乎越明

曰衛寮黎君英輩徵予記予以爲兵器之有旗纛猶六軍之有將領也蓋干楯以守戈戟以刺弓矢以卻遠皆有所事惟旗若無所事然隨其所指而六軍之士趨焉如孫武之陳行子房之發縱進退疾徐以爲節其用大矣侯君者指揮三軍而孚之者也今于祠而新之固亦有意哉夫靜而正所以藏智也動而直所以行義也智藏則靈義行則威神之德於是爲盛將兵者知所依焉則能合德於神而師旅吉凶之命自我制之矣祠以妥神惟人是因闡祠之義匪僭與悖爰鏤貞石以詔來裔

勉齋祠記

林

魁龍溪副使

漳州府志

卷之四十四

藝文四

十一

四百三十五

正德中知漳州府武陵陳公洪謨以勉齋黃先生嘗侍文公守漳請於提學姚公鏞立專祠於芝山養正書院之西以勉齋諸孫分居於漳者守之歲祭竣事則司其扃鑰嘉靖戊子按察僉事謝公汝儀以信國忠烈公文山先生過漳誅叛臣復城邑實開幕於此建文山祠於書院之中皆守臣崇德尚賢之義可尚也初謝公議勉齋於文山爲前修慮位置非宜以閒郡守陸公金公曰祀禮崇德報功垂範風化也孔子生後周公數百年後世祀之其典同孟子私淑子思之門人今與沂國公位配享文山祠中居議是無可疑者於是勉齋祠如故十一世孫增慮傳遠不可無

述請書日月於麗牲之石惟儒者之道在天下猶元氣之在萬物元氣絕則萬物息故道之所在天必生聖賢之才以壽其統文公繼往開來程準萬世從遊之士見而知之非無其人然按慶元庚申與先生遺訣之書獨曰吾道之托在此吾無憾矣則先生負荷委畀之重的然道統之傳有不可誣者今讀其書考其世究其言行事實無有一毫不本乎天命當乎人心拳拳正三綱敘九疇端士習立人紀必欲納斯世君民於三代而後已雖當時不能盡行其志然於此亦足以見真儒體道經世之大端矣陳公身爲師帥首崇先正樹之風聲以起來裔簿書期會之治可同

漳州府志

卷之四十四

藝文四

十二

四百三十九

日語哉嗟乎學先生之道者用則以所學濟天下不用則以所學善其身斯祀不虛立矣若乃先生道德出處之詳則遺書與世史在學者當求自得之何敢贅一辭

協夢堂記

林魁

郡大夫石橋先生孫公爲大理寺正時嘗夢朱文公屬以遺事覺而異之時嘉靖十四年十一月十二日也公默識之不數日有外補邵武之命郡士在京師者見公曰晦菴先生豈有遺蹟在郡乎曰樵川亦過化之士也夫子之祠在焉公至郡閱之無驗明年公改守漳至之日告職於羣祀獨文公穿開元寺曲廊而進蓋自宋時已然公病之先是

公行過三山督學潘公謂曰朱子守漳漳之有朱祠猶潮之有韓祠也潮人姓其山若水人無敢指者而朱祠門出浮屠之下不謬乎公曰然退而思之曰夢其徵矣當是時雖有改爲之志顧郡政方殷日不暇給又明年乃與僚佐登祠而達觀焉得隙地於蔽虧之東于是剪荆棘發蒙翳削嶽崎而平之循峰而麓不里許豁爲通衢而僧廬佛刹咸隔道外若天秘而待者公喜甚請狀於巡按御史白公督學僉事江公分巡僉事錢公咸是之遂卽祠左建講堂三額之曰協夢紀事兆也作四達之亭於東岡之半額之曰仰止示學者知所師也改建石坊於路首總之曰龍江

漳州府志

卷之四十四

藝文四

十三

四百二十一

書院因其舊也甃道以石衛道以垣基垣復以石廣三尺弱修百五十丈強自道原堂抵拱辰街平如卧虹舍菜之日郡人士奔走瞻對以謂韓子沒至宋南渡五百年文公始仕自文公守漳至于今五百年而祠道始通且神交默締懸屬於無朕之始有非人力所能及者今茲山川改觀儒墨異途上稱祀典下慰人心豈尋常興建可同日語哉龍溪令王君鑄郡邑博士陳君九霄翟君文祥輩奉公命來請記云

東湖祠記

林魁

東湖王先生與北溪陳先生皆朱文公高弟子同爲漳人

文公嘗守漳故漳人祀文公於郡學而以二先生配享後有司移祀文公於龍江書院郡學之祀遂寢成化中郡人行人司正林雍請於朝爲北溪立專祠獨東湖未舉人以爲闕典正德癸酉提學姚公鎮郡守陳公洪謨同知黃公芳用諸生林禮等請議撤故里淫祠德雲庵改建東湖書院祀先生會諸公遷去事中寢嘉靖乙酉提學仁和邵公銳按漳諸生吳潤輩請益力公報如請於是東湖書院始立所司修祀如禮人士躋之顧祠記未立非以永世今郡守姑蘓陸公金下車首訪先哲於是郡文學鄭君廷望白其事且請立石公曰樹風聲起遺俗其亟圖毋緩爰徵記

## 漳州府志

### 卷之四十四

藝文四

### 十四

四百五十六

文於魁謹按先儒黃勉齋著先生行狀先生名遇字子合世居龍溪東湖天資穎敏自力於學乾道中以上舍中甲科旣仕歷三調乃不遠千里受業於晦菴東萊南軒三先生之門考德問業以正學不明爲己憂精思力行以求自得視聲名利祿泊如也所著有論孟講義兩漢博議槩交集若干卷行于時仕至大宗正遷右司郎中卒于位茲其始卒之大略也抑嘗考先生之績求先生之學矣其教蘄州也正學興承懷安長樂也善治興去之日民立祠以報德不受陳自強之薦不立韓侂胄之朝守毗陵講求荒政修復水利役重而民不困歲旱而民不饑及爲常平使者

入對則曰飭躬剛大以進厥德急聞直言以救闕失樂從公議以扶正道斷絕斜封墨勅之原常存視民如傷之念嗚呼卽其愛君惠民之道行義出處之節沛乎其不可禦確乎其不可拔夫豈在古賢人之後哉傳述其從仕四十年在朝者不過數月官不過郎曹而鞠躬盡瘁至於老死而無憾謂非學識之精義理之明超然於流俗之表不以一毫私欲累其心者不能及也孔子曰仁以爲己任不亦重乎死而後已不亦遠乎求諸聖門先生可謂宏毅之士矣祠歷三政而後告成和義舉禮崇正闢邪之機係焉厥惟艱哉是用書之以告將來

## 漳州府志

### 卷之四十四

藝文四

### 十五

四百三十七

長泰縣朱侯築城記

林 魁

長泰置縣始自南唐歷宋迄元厥城惟土入國朝洪武初乃砌以石工費浩繁其所成者無幾而缺者尚多焉成化以來屢舉而修之官代弊滋徒爲勞費而城之廢弛日益甚正德十三年冬朱侯下車興利除害崇本抑末凡政可以久安厥民者無所不用其誠一日閱城睇遺址而歎曰城所以捍外衛內城之不城令之責也但邑小民寡其財與力莫能辦爾吾知所以處之矣適諸當道稔知侯之有爲悉以城事屬之而民以此注望侯亦以此自任乃躬親營度定其規模相其高下因其舊而加之以新凡厲鍛之

材畚鍤之具工匠徒役之備總計其費白金至三千五百有奇於是治城之舊牘得蠹匠侵漁與奸民逋負者考刑書得贖鍰者鬻官地寺田得輸直者約共數可當十九不足者以敗橋廢寺石充之謀既定用既足興工於十五年九月癸酉籍民之可任者得百五十有六家仍較其糧之多寡以爲給銀等差而修城之丈尺偕之程限有期勸懲有方衆大懽悅相先以赴越十二月壬寅而功告成其城周圍九百三十六丈合四門樓基適滿千丈增修者十居其七全砌者十居其二仍舊者不及十之一東南瀕溪高丈五尺西北負山高丈三尺城之外塹山爲濠與溪水相

漳州府志

卷之四十四

藝文四

十六

四百四十七

周匝四門爲樓樓左右爲磴道四隅爲窩舖環城上爲女牆裏爲馬路至是始爲完城而突兀壯麗隱然有金湯之勝數百年之墜緒一旦聿然以興而舉邑之民無復向時寇掠之虞矣初侯之經始茲役也以愛惜民財保養民力爲主故綜財於公而使之不費均力以產而使之不擾是以三月之間無疆之保障成焉其所以運諸心而孚乎人者豈聲色可倖致哉易曰說以先民民忘其勞侯實有焉邑士民感侯之德將頌諸石以予與侯有同年之雅故屬以文予惟文欲信後不務虛美而直書其實如此侯諱絃字廷和直隸無錫人前壬戌進士

漳州府重新府治記

主事 鄭善夫 福州人

嘉靖二年春二月漳州府治成張子集案屬示厥成績前參知周子某佐理是邦贊厥具美請憲諸貞石遂委役于少谷某附志業於二子者役無愛也禮匠人營邦五等其堂際庭序廊廡閎闈各有差以戒分也堂皆南嚮其崇修數尋以臨明也有燕饗之堂以肅賓合案以議庶政其隅有室以退思過今之郡治卽古之侯國也漳州南衽海又控島夷實維雄邦三方皆連亘巖砦峒蠻修阻厭大兵其按制防虞之艱實不與他邦類先是漳之治堂弗治樽櫨橈腐級甃四圻其燕堂爲墟蝕于奧草門卷傾闔吏露處

漳州府志

卷之四十四

藝文四

十七

四百四十八

是謂弗莊民之慢政且久也嘉靖改元張子假臺臣出牧于漳至則喟然曰夫土階旣遠明德新民是用莊以涖者茲弗治乃可以涖乎於是乎度貲于郡倅杜君昂聶君仁郡提刑胡君宗道得請游粟若干石於是乎以七月載功以龍溪尉聶彥漳浦尉莫魯司征郭玉耆民王虞煥以其能受勾會以南靖尉關鳳受陶甄平貿百用凡石材瓴甌磁錘楨幹絢堊之屬一時而登傭游民而役之七閱月而治成爲燕堂八楹崇五仞六咫修十尋而上橫度九尺筵十四之而下遷外帑于左周序蓋甃悉以石用杜寇名曰廣濟前爲堂治其漫漶鮮以白盛黃錯而繡綰堂東西

爲卷二十楹南爲門二階三閤既槩昭其觀也夫漳人營室其它材最艱材延建以至輸轉卒登于其直茲惟始事也龍溪茶磴有靈石裂決漲木千章來會城下是困崖嶠十許禩者耄老驚曰自生於斯齒齷而豁未見此豈天將神之以相公之營邪之役也貲出於游粟力傭於游民神相以材問之四人無厲者足以知君子之政矣古人云作室猶治身門堂寢室猶之四肢百骸也而吾中處猶心也門廡不治猶手足之不仁也手足不仁不累心乎哉古人埽滌舍宇正使心地清明明德新民一也張子之政蓋自心身之治而用之民者也高閑夷庭豈徒莊耶將使繼

漳州府志

卷之四十四

藝文四

十八

四百四十五

者覩其外思無歉於內也張子諱鵬西川洪雅人爲侍御史激奸振滯見正德中云是年秋九月日記

重建巡海道公署碑記

侍郎

鄭

岳

莆田人

嘉靖庚寅都憲淮陽胡公重器奉命巡視閩浙其秋抵漳閱兵弭盜爲憲副四明謝公汝儀曰漳爲盜之根柢而遙制於省城非便若巡海職也其開視於漳親臨調度庶克有濟謝公曰然于是胡公旣以聞諸朝卽命漳守陸君金爲營巡海分司務俾壯觀通判陳必升相其役廼度地于城東得鎮撫司舊址且復其旁侵地幅員可十餘畝以是冬十一月肇工廼建正堂及後堂堂各五楹規制宏敞以

出政也中連以川堂左右翼以廂房憲史居之堂之前爲月臺爲甬道中爲儀門外爲大門門左右爲館以處官屬之有事候謁者立棹楔于前曰控制全閩又前界以屏牆月臺之左別爲門以通燕處前堂後寢翼以東西廳前東爲樓外爲門爲垣規制差殺以退休也月臺之右別爲門以通射圃其後並爲崇樓十有二楹曰鎮寧樓觀德圖事亦于是乎在越明年閏六月工告成堅礎隆棟高門夷庭樓觀轟轟階序秩秩周阿峻整丹雘輝煥觀者以分司鉅麗實甲閩中矣

重建平和縣儒學碑

林功懋

漳浦人

漳州府志

卷之四十四

藝文四

十九

四百三十二

平和舊隸南靖正德丁丑大中丞王公陽明以地險民梗建議僻邑學始昉於此矣然時方草昧功惟求成略於正位簡於辯才越弗三紀而圯頽莫支適江右趙侯蒞政之明年爲嘉靖壬子春政通人和百廢具舉迺協邑博廖君倡議捐俸相地量貲良工飭木徂徠獻碩移文廟舊址上數十尺徙明倫堂並見廟東地得其良山面其勝於凡祠廡亭所官廨號舍列次咸宜規制視前豁如也費取樂助帑餘無毫及民功未逾期而成衆不知役友人許子鼎曾子璋歷侯之勞頌侯之勲徵予志之予惟國家建學教民患或弗率命之長吏以師帥之長吏得人則學校修而教

化明士人彬彬向善其或不然教化視爲虛文學宮鞠於  
茂草學校之政凌夷尚何望於人才之盛風俗之美哉考  
之傳記史稱循良克承是職者代不多見若漢之文翁興  
學於蜀唐之常袞興學於閩故閩蜀至今稱人才之盛者  
頌弗衰二公之功然則趙侯今日興學作人之績當不出  
古達人之下繇是而禮師儒於上羣弟子於中朝夕相與  
講明正學如爲臣盡忠爲子盡孝樂育不倦俾爲士者耳  
而聞目而見不見異物而遷其處也皆實材其出也皆實  
用且使宮牆外望者觀感則儆教不出於俎豆而風移俗  
易維新之化與斯作俱新則趙侯之功亦將與斯學相仍

漳州府志

卷之四十四

藝文四

二十一

四百三十九

於無弊矣趙侯名進江右南豐人廖君名瑚廣東海陽人  
餘董其事者不能盡載則并勒之他碑云

文信公祠記

學士豐

熙四明人

天地之位由三才參也三才之參由三綱立也三綱弗立  
人紀亂矣于是乎天地易位而人之類滅是故立三綱參  
三才位天地聖賢之所拳拳焉是故君臣之義也義其無  
所逃而捐軀弗恤成天地也文信公天祥精忠大節烜赫  
宇宙漳郡其駐師誅叛之地也方起贛勤王屢挫益勵收  
兵汀州遣參贊吳浚輩取雩都諸縣元兵犯闕守携貳公  
移漳圖入衛他將提兵歸而浚叛降元來說公公縛浚縊

殺之嗚呼公之心期以固繫人心幹汙世運挈寰中還之  
宋其浩然之氣光日月而轟雷霆泰華溟渤爭高深利鈍  
非所計厥後崎嶇嶺海兵敗身執抗節數年從容就義固  
所遇不同而扶植人紀對越天地爲萬世忠義者範其聖  
賢之徒哉公童時見學宮祠歐陽修而下三忠喟曰歿不  
俎豆其間非夫也對策集英時稱古義若龜鑑忠肝如鐵  
石卒之取義成仁身雖死而心不死視負國全身家遺臭  
靡窮者何如哉凡所經歷卒爲表顯而漳固猶闕嘉靖己  
丑龍溪處士蔡烈言于分巡僉事謝汝儀欣然意會白諸  
提督都御史周用巡按御史施山報可乃屬漳郡守陸公  
漳州府志

卷之四十四

藝文四

二十一

四百三十三

金相度得開元寺東得養正書院幾楹黜堊增飭煥然麗  
觀肖公集中小影像設其中取新墾田租三十七石供祀  
守率僚屬歲再躬祀著爲規嗚呼世變江河人而不天者  
久矣是祠之立俾觀感者於國思忠於家思孝敬聿崇綱  
常以共保雍熙之治而公於昭之靈庶有臨乎熙罪放于  
茲逢盛舉之成間嘗步城外木棉庵故址讀穹碑書賈似  
道事並觀之重有感焉

建平和縣碑記

御史

馬明衡

莆田人

平和先隸南靖去郭二百餘里民阻山依險當道者襄之  
無寧日正德辛未郡守鍾公繇禮部郎領漳事激此歎曰

惟先王建邦啓土各用樹之州牧侯長奚在而不欲生之  
茲人迺自懼威戚如是吾獨不能宣力於其間遂遍達監  
司連狀以聞上命前僉臬胡公璉督率官兵屬駐師險厄  
臧謀慎動象事伸縮如是累月卒能馘其渠魁撫其脅從  
東土稍寧而又懼非長久之道覆詳諸司僉議設縣疏上  
天子可其奏謂地曠民頑卽若析南靖之半分理得人將  
寇平而人和維時當道諸臣欽承制意宰割清寧新安二  
里又二里之中相視可以梗盜賊之喉牙制其心腹而按  
其衝則得河頭大洋陂之勝新其縣曰平和始南靖尹施  
君祥承委燔菑翳披蒙茸肇建墉壑以翰以蕃續又分任

漳州府志

卷之四十四

藝文四

二十二

四百三十七

二守陳君昊賢畫厥井疆途道市肆時凡庶尹諸人士亦  
各得罄所力民事頗就緒民用更生蓋所謂休之否而屯  
之亨也顧時方經始百度未熙旋不數年而事之廢弛民  
之凋瘠特又甚不田不賦不居不役莫可禁制窮山大盜  
卽往往相機者乎果如是余將賀其見鳳而聽其鳴也已  
鍾公諱湘湖廣興國人王公諱祿號一溪建昌新城人詞  
曰爰披溟濛拓茲新邑歸鍾于民莫匪爾極紹績咸熙夷  
茲險阻惠流一溪實獲我所芬爲太和裕爲瑞氣勒石鐫  
辭爲示無止

長泰縣平役記

按察  
盧岐嶷  
長泰人

平役有記者何記役之所由平也由後之平則由前者不得其平矣孰平之三使君平之碑迄今始建者何前此猶未盡平至南泉羅公而後定苛斂代輸爲民所苦者悉去焉此碑所由作也泰舊屬于泉宋咸淳間民苦輦輸之艱乞改隸漳願倍其賦從之故賦額倍他邑成化間百姓奏言賦重事下有司均田每一畝率載糧七升糧猶浮于田乃攤其餘糧入于溪山園地泰賦獨重故徭役視他邑稍輕其來舊矣凡均徭皆郡邑主之郡邑察其土宜守舊法而已間者舍郡邑而別有選用之人以意輕重齊末遺本一旦忽下教曰詔安洪淡金石巡卒充餉倍徵之數千一

## 漳州府志

### 卷之四十四

藝文四

二十三

四百六十一

百有奇俱令長泰代輸民駭不知所爲咸涕泣于臺司郡邑之庭曰泰壤地僅比詔安之半而糧額倍之若使二邑履畝而較之廣狹相去奚啻三倍且詔安有海泊魚鹽之利溪山園地無征長泰無海泊魚鹽之利溪山園地有征使長泰代詔安役是輕重失倫也矧賦役之制監察沈公所定稱便者六十年矣其可改乎時麓陽唐公誠源葛公相繼爲刺史皆言詔安徭役雖重乃十年一輸且籍有遺丁地有遺利長泰賦額獨倍則歲歲爲累且籍無遺丁地無遺利輕重當其舊乃減長泰代輸之半復歸詔安民猶訴不休今使君南泉羅公又言瀕海巡卒當復設以防要

害酌一歲防汛緩急量減其僱直三之一以充儲餉賦役不越境洪淡金石邏卒宜悉屬詔安所減僱直以充餉者特免勿徵官捐數百緡則二邑爭訟自解詔安獲輕長泰獲免抑又何求巡撫殷公慨然曰刺史恤民如此吾不難捐餉也時劉公爲監察裁答亦如之二邑咸稱便焉蓋往日久不決者重捐餉耳公方練土著之民以減客兵收番舶之利以代加賦兵食旣足經略旣定宜所言之輒售也夫負重喘息者解其半脫然喜矣況弛其負而休之者乎疾痛呻吟者得暫安噲然卧矣況去其疾而愈之者乎唐公葛公解其半而與之暫安其憂民也深羅公盡弛其負

## 漳州府志

### 卷之四十四

藝文四

### 二十四

四百四十七

去其疾其利民也大皆爲百姓慮施及子孫者也事之初起也民疑前令以暱嫌密啓其端殆未必然及今之平也則三使君主之于上侯明府爭之于下三公海內之望侯君爲名宰迄數歲而始平何變之易復之難也法其可輕變哉前令奪其子以厚其隣疑於公後令爲其子訟疑於私非使君以鳴鳩之平均養之義折衷之茲役何由平法其可輕變哉邑人懷德授予始末俾書於左方作平役記

#### 長泰縣朱文公祠碑記

盧岐嶷

泰邑舊有文公祠以祀紫陽朱夫子先輩黃廷實記其事經始於洪武三十三年攝令博士章君參請于朝所建記

言置田入穀以供享奠又言文公之祠世世未涯雖名書院其實祠也紫陽之道與天地相終始祠迄今未改何以碑將廢而復存廢則吾徒安仰存則斯道爲烈故碑之昭宏道示不朽也近日海內學者多鈎合虛聲朝議慮魯鼎售贗鄭璞非眞故禁之創立書院以邀徒與者悉毀之則所毀者乃刱建非沿舊齋舍爾非祠宇也而文公祠襲舊名按籍在毀中令下撤屋鬻其基督責甚峻里中富人子已操贏計直從旁睨之矣明府方侯偕姜黃二博士詣祠所愀然曰祠直僅數鍰以佐經費猶掬土增山揮汗滴海也且紫陽闡道以示來世而不庇其祠乎密啓撫臺勞公

## 漳州府志

### 卷之四十四

藝文四

### 二十五

四百六十一

謂先賢有遺化鬻祠非美名臺下倡道作人方切崇重之意而下屬奉檄行事乃貽不韙之名毋亦過於畏臺下之法而不深諒臺下之心也若或官賣而私存是樹德於己而過歸於上義不敢出如必毀廟而仆碑是法在必行而情不以告尤爲未安且援張方平公抗疏上請四祠獲存以諷言已非劉摯願公爲張公明府自度必直道乃見太直必忤當以去就爭之慮先泄聞者必諫恐中輟旣遣行而後告人人皆危之撫臺發視深韙之檄郡邑凡先賢祠以書院名者止勿鬻行部至建州建守奉檄與試事辭行公首問泰令得與否則已與矣怡然以喜旣而以廉能薦

當此之時郡邑相傳爲美談嗟乎理可自信而事難測度故喜慍不可以度人因循不可以恕己直道未必忤緘默未必容道之興廢雖係于命亦存乎人乃患失之夫與世浮沉而信心之士夷險弗顧所趣何異也嘗一嚮知一鑊卽一事其他可知已明府名應時向爲遂安諸生時白邑令邀同志築室瀛山以祝紫陽其地有文公講論格致往來舊跡故祠焉信道蓋維昔然矣洪先屬余記戴生廷采張生問行陳生鼎臣沈生輔掖維翰請焉遂記之

雲霄復公溪泥泊記

尚書 朱天球 漳浦人

先王之世鄉田同井溝洫畎澮之公駿發徹併之法民遵

漳州府志

卷之四十四

藝文四

二十六

四百五十一

上之度罔敢渝忒故當其時貨惡其棄于地不必藏于己力惡其不出于身不必爲己雍睦輯寧之風藹然可挹其上之人又不禁澤梁與民共之民是以公溥其利沾足熙皞無獨饑獨寒者猗歟盛哉自先王法廢民始有兼併攘竊之謀誠有歎貧富不均如連阡陌無卓錫云者盜竊亂賊由是以作曷勝患已我國家深仁渥澤藏富於民凡山澤之利悉捐與民不爲禁顧饗詖之民有肆爲兼併攘竊封利以自肥者余居常聞其人輒憤恚不直之入官莅政遇以是事至必麗諸法公其利而後已蓋居今之世旣不能復古先王之法而爲國家守良法沛宏澤俾古昔大同

之俗雍睦輯寧之化庶幾復見者則願身親見之也乃今  
辛於吾鄉見之雲霄有大溪達海者二一自南山尾歷蠓  
潭竹塔油草等界迄于烏坵一自南山尾歷高溪大墩橫  
山等界迄于北崎海潮日再至兩岸淤爲泥泊鱗介諸利  
產焉二溪會于海口中流突起大洲廣袤十餘里名爲中  
洲大塗其產利視南北諸泥泊尤盛官不爲禁環海千餘  
家胥藉以生若恒產然成化間有豪民某者設網門築田  
其間再傳而其孫席富強餘習攘爲己有漁者必入稅而  
後敢碾足一方公利專爲一人之私物民莫敢誰何者殆  
百年所萬歷二年鄉民陳川等數百人奔籲于巡海副使

漳州府志

卷之四十四

藝文四

二十七

四百四十

會稽陶公某下其事於郡二守沈公某沈公廉其狀乃還  
公利於一方而以報陶公轉報撫臺臨武劉公某按臺餘  
姚孫公某咸是之且令立石垂之遠於是耆老輩造余求  
紀其事嗟乎此先王之遺政也夫自大同之世遠民有併  
力均收而寓雍睦輯寧之化者公利是也沈公加意窮民  
舉遺政於千百世之下復公利於百十年之餘監司諸公  
又且同心共濟使雲霄環海之民自今始生養有資嬉嬉  
然出入友厚和氣薰蒸無獨饑獨寒之歎庶幾見古大同  
之俗者誰之賜也夫茲政也古之遺愛也爰宜勒諸石以  
紀其盛

新亭水利碑記

副都 蔡文龍  
龍溪人

出龍溪縣東五十里厥地鹹鹵民艱於稼穡逐於商賈終歲所奉仰終於四方者六八都也西起月港東抵浮宮數拆而南而西外障鹽潮內蓄淡源俾禾黍不傷農人得業者昔人所爲官岸也邇來淡源漏泄鹽潮復浸小有旱荒輒爲民患則貪頑嗜利於官岸新埭而木石涵也合涵大小三十餘口而盡塞之去今之敝存古之利請於官司杜絕害本則養齊先生悉心於鄉垂仁德於無窮也始先生之議白夫所爲此者知一人之利而不慮萬人之害也今以萬人之公攻一人之私於義其可夫鹹潮之來防如盜

漳州府志

卷之四十四

藝文四

二十八

四百四十

賊而敢縱之淡源之積藏若珠玉而敢棄之鱗介之利孰與穀粟之珍隙蠹之漏甚於江河之決失今不救是棄膏腴爲鹹鹵也救之則變鹹鹵爲膏腴也於是倡率舉事彼不敢怨而此蒙其利故天下事患不肯爲未有爲之而無成者先生以遼王傅退休居其道德仁義能率一鄉之人而鄉人疑有不能斷者力有不能任者皆請於先生而後得也古有鄉先生者生以尊於鄉沒以祭於社其是之謂乎斯舉也請而報可者分守萬公分巡梁公提督水利黃公若通判徐公則來莅茲鄉而首役也向義者耆老劉公晦陳曰甫等而請余文云

重修龍溪縣學記

蔡文

蔡侯以丁未進士出宰龍溪其爲治急於興教化成人材厚風俗維是邑儒學自宋嘉祐辛丑迄今四百餘年中間興廢之跡詳矣夫事有漸壞制有未備侯莅政以來約以裕民度時舉事經始於乙卯年春而告成於丁巳年夏學有文廟兩廡儀門明倫堂兩齋啓聖公祠敬一箴亭讀書樓大魁樓倉厨之次廨舍之位棟樑榱桷板檻瓦級圯墁之蠹腐缺折漉漫不鮮者治之新之櫺星門易樹堅石可垂永久泮池開削隅隘疏濬淤淺而環砌以石北立石欄南樹高墉東西築號房各十間以居學者舊有射圃湮廢

漳州府志

卷之四十四

藝文四

二十九

四百四十五

已久乃於墉之東南剪除礫穢辨正方位而決拾有次東構閱射廳三間與騰蛟山對峙則學者講讀之餘遊藝其間而古禮可見也而侯旦夕必至於以校德論能士皆歡欣踴躍服習其教於是教諭曾君宸邵君棠訓導余君顓廖君尚修合諸士之意謀紀侯績而以屬文夫世謂海濱僻陋非上國文獻之倫非通論也龍溪自晦菴先生過化以來民知冠婚喪祭之禮士習堯舜周孔之學故陳北溪劉愛禮陳布衣先後繼作天下稱之今侯旣以道德仁義倡率於上又以時經理頽廢昭新耳目自茲以往有能繼侯之烈承以不墜則龍溪文獻可與上國比隆而侯休問

永不沒於天下後世矣然在諸士不可以不勉也夫上承賢侯之誨前仰賢哲之範依宮墻而親俎豆幸生太平之世矣苟學不立咎將誰執易曰君子進德修業欲及時也諸士勗諸侯名亨嘉字元會廣東潮陽人曾邵余廖四君者並協謀贊事有功於是役也故具書焉

膚功遺愛碣記

王慎中

蔣繼業劉伯需踵門見予衣履菲陋貌俚而視野予不知其何爲來卒然言曰將有請予怪問之曰吾漳州龍溪大地里人也巖棲而隴耨作息在蹊壑之間以其幽昧荒阻居出西園常穴盜焉苦之而不能禦是歲八月汀漳守備

漳州府志

卷之四十四

藝文四

三十

四百三十七

俞公以督府之檄來徼盜盡得之吾等不忘其功將勒之石予曰守備逐盜而得盜職也若何石焉曰吾等深有不可忘者不獨以得盜也凡盜之攻奪吾聚落避之猶有可免哀之猶有可丐而吏士之逐盜至者不可避而免不可哀而丐也未嘗有得盜之功而重以播民之虐今守備俞公之至吾地禁戒肅而約束明卒伍無敢喧於閭吾安吾棲而治吾耨作息循旦暮之候而不知兵之在吾境老稚嬉游以閱俘馘之過而無變容驚叱之虞畜之特於疇者可數而收葵之在園者莖葉無所損老詔其少尊語其卑不圖生身以來獲蒙此幸又不圖目覩以來乃見茲美壺

殮斗酒之餽卻而不嘗山織野繭之所治又不敢以獻相與鬱而不鬯謀所以報之其術無繇是以敢冒然而來請也二人者田野之人也其言質而慤予怪其知不忘俞君之德而又知來請予之文孰謂野人而不知禮哉孰謂野人而不好義哉吾何說以辭之哉遂次數語以畀之因名其石曰膚功遺愛使歸鑱之以旌俞君之伐以不孤二人之勤而慰大地里人之意也俞君名大猷字志輔別號虛江以泉州衛百戶由武舉歷陞爲汀漳守備署都指揮僉事

詔安修學記

舉人 許 判 詔安

漳州府志

卷之四十四

藝文四

三十一

四百二十五

嘉靖二十年甲辰筠陽廖侯來蒞茲邑靖寇安民惠孚閩海之濱期月而留意學校以廟學創始成于倉卒之際泊今日漸傾圯制亦未備有餘慨焉乃謀諸邑博姚君熙相與振飭舊者葺其敝缺者置其制綜理密也明倫堂東西爲兩齋爲號舍後爲講堂東西爲兩官廡大成殿東西爲兩廡爲戟門又前爲櫺星門左爲儒學門外爲泮池是皆創於昔而今漸以敝者敝斯葺折者易良漈者易鮮葺敝以圖新也陳生茂高輩屬余記其事竊原廟學兼備之義有斐髦士選而納之膠庠藏修息遊率於孔子之道共學焉學其道則思祀其人祀其人則思必志於其道廟妥先

聖之靈固報德報功之典仰止之下亦神默化之機唐倣  
裔教廟設塑像聖人在天之靈必不之歆何以潛啓人文  
耶今聖天子特詔撤象祀主以革數百年裔教而慰廟靈  
可於是乎仰止而默化卓爾之道焉上之人所以爲髦士  
處者如此冀夫學之成也試言學之道爲諸髦士告可乎  
孔子博約之教精一之傳也從博約而學者所由以適于  
道也然有主朱子先博文後約禮爲知行先後之學者有  
主陸子博文約禮爲知行合一之學者皆學必能知能行  
然後可以造道成德其教同也偏則流於支離禪寂之弊  
非教使之然也若先後合一之功則用功下手處固有不

漳州府志

卷之四十四

藝文四

三十二

四百四十六

同然亦不甚相戾道一之編可考也于今日聖廟之教亦  
有合乎英宗皇帝命憲臣提督學校賜之飭諭首條大意  
欲學者於聖賢之道知而能行敦德性之善行黜口耳之  
浮誇養成真材以爲朝廷用聖朝所以爲教如此由教而  
入知至至之知終終之豈非學者所當自盡哉我邑文教  
漸興豈無循博約之訓勵身心之學發爲渾灑之文出際  
亨嘉之會以翊皇猷以贊王化求不負聖朝教養之意賢  
令尹作興之功哉存乎其人言有待也若徒竊浮靡之辭  
以爲進用捷徑學非身心誰顧名檢奚足爲世道倚賴亦  
奚足於學校炫一時之觀乎

王公城碑記

吏部郎中傅夏器南安人

漳之南山麓所延水勢所趨至龍溪縣之八都九都而會海其地之形水縈之如月然故爲月港人煙輻輳商賈咸聚顧其地濱海際無涯風濤出沒無常識者憂之嘉靖戊申撫臺朱公紈疏請立邑弗果未數年果潮賊入寇倭夷繼擾奸民亦不靖地遂邱墟嘉靖四十四年百姓復相率以立邑請 詔下其議前守唐公九德力陳其便於兩臺汪公道昆王公宗載以聞既報下乃得分龍溪漳浦之地自爲縣曰海澄是時百事草創卽八都舊堡置縣治而建學宮於九都土壤爲垣卑陋殊甚職於地者雖知其當城

漳州府志

卷之四十四

藝文四

三十三

四百五十三

竟以兵燹之後未遑隆慶五年臨海王公以鄉進士來尹茲邑按圖省方慨然曰惟地有險成之在人於是撤故堡而代以石賦丈以任力計財以鳩工均以闔邑之丁糧充以八縣之郵羨晝作暮程細鉅必親經始於辛未冬十一月告成於壬申八月城垣周五百二十二丈高二丈城樓四座東曰清波西曰環橋南曰揚威北曰拱極月城三座重門一座窩舖一十二座堞子二千四百有零遂翼然於海上爲壯邑太學生張甫率耆民某某等以其記徵於余嘗聞夫子言三代之英城郭溝池以爲固禮義以爲紀其事相須以此地論之城郭之未立而寇賊之昌熾也大海

跨以爲鼎毒焰積以爲薪聚萬物於鼎沸之中父不得有其子兄不得有其弟夫不得有其妻天倫天敘之常潰然泯亂及夫城郭之立而守禦之備父子兄弟夫妻得相親相保以相秩之而爲禮宜之而爲義濡之如甘露灑之如清風以城郭之未立如彼已立如此則城郭固不關於禮義之大歟王公世家之裔大方之英勵介操勤民務聲稱治於上下四遠所稔聞欲以洽禮義先於嚴守禦故以是爲民務之大而竭力以圖之如是也是不可以無記記之亦以見南服底定之績也禮義遠被之盛也非惟記海澄一城而已

## 漳州府志

### 卷之四十四

藝文四

### 三十四

四百三十一

#### 新建海澄縣城碑記

侍郎

呂

旻 龍溪

海澄舊月港也爲龍溪八都九都之境一水中塹回環如偃月萬室攢羅列隊百重自昔號爲巨鎮顧其地濱海潮汐吐納彝艘鱗集遊業奇民捐生競利滅沒風濤少牴牾輒按劍相視剽悍成俗莫可禁遏當道者憂之嘉靖戊申中丞秋厓朱公循百姓之請疏立邑于茲士格持議者弗果亡何島彝入寇奸彝煽殃相率叩關復以立邑請詔下其議前守麓陽唐公縷陳其便力懇于兩臺中丞南明汪公侍御又池王公以聞旣報可海澄乃得自爲縣時嘉靖丙寅歲也先是八都九都各有堡以自衛而八都扼海口

當賊之衝唐公于是卽八都之堡置縣治而建學宮于九都當其時海氛四塞戎事方殷取粗辦目前而已因陋襲敝民猶惴惴若集木然有識者屢欲城之竟以兵燹之後民力未充弗遑也隆慶庚午南泉羅公來守我漳按圖省方每惻然念曰縣澄所以捍漳也乃弗城奚以縣爲未雨綢繆今其時矣顧誰與我共此者乎旣而澄尹臨海王君以城請公喜曰是足副吾志矣卽命駕往臨周視原野相度險夷遂戒工于八都撤故堡甃石焉慮材鳩庸賦仗任力酌闔邑丁糧以均其役取諸郵羨錢以充其費版築斯興舁輦咸集經始于壬申之春抵秋而成垣高二丈許周

## 漳州府志

### 卷之四十四

藝文四

### 三十五

四百五十七

五百丈有奇闢門四東曰清波西曰環橋南曰揚威北曰拱極皆新制也易庠爲崇化監爲堅樓堞連雲溟渤爲池規制形勝翼翼冠諸邑矣易重設險以守國禮城郭溝池以爲固蓋民保於城嚴扃鐃樹藩屏王政所必先也矧澄屹立海上外邊諸彝識易動難安者乎南泉公閱達子諒才與固合下車以來蠲逋省餉置學租剏書院征番舶以佐軍興扼險阻以遏寇攘濬郡城之渠以疏地脉折烏礁之壩以弭水患其碩畫遠猷未易殫述要皆安民固圉垂休無窮宜其汲汲于澄而亟圖萬世之安也詩咏南仲城方玃玃于襄傳美叔敖城圻不愆于素古之遺烈也今公

一屬慮能使官不侈費民不苦勞海隅新邑隱然有金湯  
百二之勢鯨波不興邊徼無警卽南仲叔敖之功寧復是  
過澄人樂得所庇莫不戴公功德念無以爲報者于是介  
文學某等徵予記托諸貞珉用昭不朽嗟乎我公德寧獨  
澄哉全閩寧謐將終賴之其敢以不文辭公名青霄蜀之  
忠州人起家壬戌進士所至聲稱籍甚貳守羅公拱辰殷  
公康別駕吳公用章司理尹公瑾皆協贊厥成者王尹名  
穀治行雅著于茲役尤勤義得並書云

詔安縣廣南橋記

參政 林偕春 漳浦

橋梁之政自古重之故其財必取諸民而其權則歸于上

漳州府志

卷之四十四

藝文四

三十六

四百四十二

自夫上之人或浚其民以爲利而下之人或弁髦視其上  
而不肯輸其財力以爲之用於是乎其嬰奭焉者旣已怠  
東之於弗顧而其稍振飭焉者又恐陷乎染指之譏而不  
敢動橋梁之政日以寢廢而病涉者衆矣人見其病涉也  
而或惻然焉富厚之家或捐己貲以徼福利之報緇黃之  
徒或募衆建以廣方便之門蓋曰此可以助上而益下云  
爾不知天下之事有其任則有其責則其成毀修圯之間  
乃爲禍譴福祐之所及今夫橋梁道路之修乃有土者之  
青彼其人之責不自任以爲功而吾乃貪之以爲己力可  
乎是徒以邱民之微而竊夫公上之權者也而胡可以福

利冀上之於民既以取之爲憚而募民之舉則指十歛百指百歛千紛紛求請甚於頭會蓋用之者十二三而漁獵之者十六七矣且其所歛者豈盡皆其人之欲與夫遠方外邑商賈賓旅之所出哉類吾宇下之民迫於義而動者也乃使此輩得以爲名是委其權於下而竟亦用民之力者也奚便之有嗚呼王政不行而世之爲民上者其失所重久矣予嘗以此說藏之于心而是歲履端之首適有詔安大尹鄧公白屏者以橋記來請余詢其故則曰邑地東有洋尾溪爲閩廣往來絡繹之津舊募舟以渡故雨水時溢或風濤迅激不利涉邇以海警日夜過師頗梁之以木

## 漳州府志

### 卷之四十四

藝文四

### 三十七

四百五十七

而頻年修葺勞費且無已時蕃入境亟欲石梁之以圖堅久會歲且荒歉未遑幸今年和民悅諸務稍暇乃召匠計直鳩衆授役以去歲十月十二日鑿石興工計今歲春夏間可告成事矣貲皆取之吾民有力好義者樂助之者也蓋于是時已擢二守三山以去而諸工料調度則俱授有成算云夫詔于邑不爲繁沃而其民亦皆纖嗇爲生非有陶朱積居之富卜式奉公之誠者也公爲之逾年能舉數十年未興之役期成之以數月至使瀉鹵纖儉之民咸樂輸其財力以爲之用雖其去役不少輟此果何政之修哉蓋公嘗爲令寧洋以拊循愛養著名詔之民已知有公矣

比加秩進俸來詔一下車卽詢疾苦矜寡弱輕徭役省里  
甲平訟獄修廢墜潔己正身未嘗分毫有所過取于民  
之信公深于慈父以故公令一下而遂翕然從之惟懼其  
成之不亟也夫不忌乎染指之嫌不假于徵募之擾而竟  
能以民之財之力成民之事使便及于衆而其權則歸于  
上公知爲政哉余嘉公知所重而又恐其無以諭諸後乃  
從公請而爲之記橋之長六百三十丈廣九尺爲趾九十  
有八醜水爲九十九道以是歲五月望日竣工距其始造  
日凡七閱月靡白金以兩計凡千百有六十題其名曰廣  
南圖讖也公名于蕃字价卿白屏其別號也廣之海南人  
漳州府志

卷之四十四

藝文四

三十八

四百一十七

其來詔也蓋以五品俸行令事云記之日爲萬歷辛巳四  
月十有五日

平和新作塔峰及雲龍精舍文昌閣碑記

林偕春

余自嘉靖甲子至平和迄今三十年所矣往歲癸巳始復  
一至則見其面邑文峰上石塔雙起高下相次而其迤西  
水口岡上復有雲龍精舍舍後爲文昌閣巍然鼎峙焉署  
學諭事南昌黎君觴余於精舍酒半酌而言曰憲臣以壬  
辰秋受署茲邑嘗往來漳和道中睹茲山川之勝大都來  
自洋外天半有峭石聳立餘峰礪礪串合如珠迤邐西折

而下起立爲雙髻山羣龍交翼奔飲于溪縣廨學宮在焉  
溪自東徂西紆迴曲折是之謂水西流也獨前峰微陷不  
稱議者謂宜有增補于是諮衆謀獨遂以是年十二月芟  
山通道肇建雲龍精舍于水口越明年起塔工自春逼冬  
不十月而塔峰七級成矣又度雲龍精舍後爲文昌閣舊  
文峰頂欹窄僅容足添築三層小塔于其上間從諸生登  
覽之三峰對峙前後主賓翼然相顧向焉斯亦足稱瑰特  
之觀云其費皆取諸士民樂助者不以一錢靡官也屬當  
紀成事而先生幸賁然來茲邑願丐一言以爲此山之重  
余謝不敏乃述黎君之言而爲之記記曰余以所聞堪輿

漳州府志

卷之四十四

藝文四

三十九

四百五十七

家增高益下之說義至著而共功效未易卒覩何哉要以  
人工上奪天命不可必槩之木華栗茅之理則地德人力  
亦往往有相符者不可失也何以明其然也高山康而周  
道顯楚邱望而衛國臧新豐潔而漢祚昌慈恩跼而唐制  
著是非詩書之可覩記者乎此其犖犖大者諸如一邱一  
臺一觀一塔類稗官小史所載謠俗所傳者不可勝紀未  
有不人力運而地氣隨之者也豐城之寶劍共氣上燭于  
天及其出于地中也不得華下之拂拭之則神彩不煥發  
物雖神聖尚有所裨益以發其奇者況於川嶽之靈秀蘊  
而欲開者乎磁石之能引鐵陽燧之取火氣固自相爲感

召云耳和邑于茲歷數紀山川之氣漸且融朗而其間一  
二稍缺陷未起蓋化工有待者更得明知之士工力之具  
一爲增飾其雲蒸龍變豈有量哉余不暇遠引姑就和往  
事而論方和草昧爾時士豈有望哉自南豐趙公新學宮  
而和士始接科第矣然間有寄跡于府庠旁出于他邑者  
自南海盧公築文峰而和學士始哀然爲解首矣人功興  
起於此而効驗旋至立見於彼可不謂兩符者哉今茲之  
所增飭比往又加備矣地靈人傑如呼谷響應邑之爲父  
母師帥爲博士弟子與夫縉紳之先輩俊髦之後起踵自  
今寧不有蹶然興未艾者乎余拭目觀之矣是役也肩者

## 漳州府志

### 卷之四十四

藝文四

四十

四百三十六

黎君名籍已見前主持之者前大尹寧國朱公名大謙今  
大尹羅田王公名儼協贊之者前學訓建安張君名鳳翰  
今學訓永安饒君名倬前幕史會稽陳君勲今全州蔣君  
守業也法得書

### 重興陳公開疏河記

刑部主事 楊守仁 漳浦

澄新邑也六七八都築海鹽田六千四百石先時河渠未  
通旱潦胥病民失西成之望兵部主政陳公軫念民瘼經  
畫地圖奏請捐俸募工開疏河渠上通虎渡下達清平引  
淡灌溉都民賴之國賦以供公私稱便歲久紀頹未及載  
濬隆慶辛未冬邑大夫王公莅任陳公裔孫文德詣狀請

卽舊址圖其興復遂令伐石興工而河渠於是復故工竣屬鄉進士劉文徵言於余余時承欽命南來聞斯義舉因嘆士之建功立業爲德爲民是已而苟爲一身一時之謀不爲斯民千百世之慮其功不足多也公海濱開先甲第主兵部政未遑他務慨然以都民鹽田失所爲慮又捐己俸不費於官不擾於民民享稼穡之利皆公力也報德頌功秉彝之良又烏可已陳公諱炯字仲昭洪武戊辰科進士邑大夫王公諱穀浙江臨海舉人開創之勞與再造之勛同爲悠久是爲記

管侯新建西城樓記

戴長泰燿人

漳州府志

卷之四十四

藝文四

四十一

四百三十七

吾邑自國初以至於今生齒日繁而賢士大夫後先輩出亦彬彬乎盛矣識者謂其諸山之聳拔二水之縈紆故能鍾靈毓秀發而爲文物幾與中州大縣相比埒惟城之西隅內外濱湖地勢最低而亦空缺莫不相歎息以爲造化之無全功如是也嘉靖己未之夏倭奴犯吾邑於是處攻城躡梯而上幾乎殆矣幸邑人力拒之得免又未嘗不相歎息以爲地利之有隱憂如是也邇來承平日久率因循莫之顧慮茲五陵管公以制科來宰吾邑每登城輒周遭四覽慨然有感以爲是地非構一崇臺不可詢之士民欣然其愆悛之白於當道皆報曰可於是擇吉相基鳩工集

材倣京都敵樓之制建而爲臺跨於城上高廣若干丈蓋分毫不動公帑一取諸士民之所捐助者而猶不敷皆公捐餼廩發贖緩以成之不數月而危樓雄峙雉堞崔嵬屹然有金湯之固矣習堪輿家言者亦嘖嘖以爲障空補缺全邑形勝增數十倍焉邑人屬不佞紀其事余素不嫻於詞年來浪遊四方每所至郡縣一覽其勝凡其山川之擁衛風氣之完固者莫不戶口肩摩簪紳接踵而歷代無干戈之厄不然者則閭井之蕭條科目之寥落兵火之殘破所不免焉今吾邑之有斯樓也西隅無曠闐闐安堵而民居奠矣形完氣聚賢哲益生而人文盛矣據高臨下矢石

漳州府志

卷之四十四

藝文四

四十二

四百六十个

易施奸人過之猶不敢仰視矧敢以一矢相加遺乎而亂萌銷矣公斯舉而三善備焉吾邑將世世賴之夫居室者必綢繆其牖戶高峻其垣墉然後安居高枕而緩急可恃以無恐一叵人能辨之惟夫居官者往往以傳舍視之其城郭之完缺井里之安危漫然不加休戚於其心豈其智不及一恒人哉亦其心之異視而已公以子視民以家視邑故自數載以來繕學宮修朱祠建文館諸所拮据百廢俱興而茲樓特其一耳蓋本之以真心運之而爲實政不爲一時可喜之功而爲百年長久之計故績效彰彰若是豈勉強朞月而苟焉以求名者之所能哉故治邑觀於家

治天下觀於邑今海內亦脊脊然多事矣而在事者鮮有視國如家之心故因陋就簡每有偏而不舉之處安得秉樞要者盡如公此心以濟時艱則大厦將顛庶幾哉猶可撐持而杞人可以無憂矣故述此以備里中謳歌之俚語

免雲霄鎮稅記

副使 林 紹 漳浦

漳浦無礦亦無稅邇者礦使浮募金浦之名剗開權場于雲霄鎮市市民以該鎮距詔安百里詔安已稅雲霄復稅民日擔負魚蝦薪米之末僅售刀錐安論餉課于是驚擾

漳州府志

卷之四十四

藝文四

四十二

四百〇五

久之一白晝揚旗一夜深舉火舍人倉遽歸報中貴人怒髮上指幾爲王侯累侯慨然曰臣以無罪待罪銅章倘得爲民弭患從貴人逮係歸鄉里民職塞矣于是市民咸奮爭以其行貨居貨自占歲率攤錢百緡輸之官經解內監無令別遣材官重擾民爲議上撫臣臺臬嘖嘖異之侯又上言曰夫浦邑之有雲霄猶全閩之有漳浦也先年倭饒煽亂鎮人負其魁傑之氣開關延敵賊人大創至不敢城下彎弓微獨浦邑賴之卽全閩亦賴之矣今若起稅勢必凋敝蕩析在目前無過九牛一毛之利一旦東南有警是我且自撤重門彼必別生內變甚非鎮守自爲桑土之計

也中貴讀侯危言且咤且怵坐稅百緡旋亦報罷噫侯之  
遇事慷慨籌慮深長類如此君子謂侯之惠全浦雲霄鎮  
其一也其惠雲霄鎮議免稅其一也鎮人立石以頌侯瀾  
瀾之德有以也夫行康熙丁丑春有巨帥遣其爪牙士開陳  
汝咸力持此事與王公後先媿美而雲霄開陳不知也嗟乎  
皆雲霄鎮也中貴人欲稅之於前巨帥欲稅之於後實  
後之為政者尚其稔諸人  
公名猷與陳公俱四明人

漳州府志

卷之四十四

藝文四

四十四

二百二十四